

“Nuteke ntatu yenu yonso kudiye, bualu bua yeye udi unulubulula” (1 Petelo 5:7)

“Kabatu bapana mishamisha ibidi ku dituku dikese, anyi? Mushamusha umue kawena upona panshi, anu pitabuja Tatu wenu. Nsuki ya ku mitu yenu mene mene idi mibala yonso. Nunku kanutshinyi, mushinga wenu udi mutambe wa mishamisha ya bungi. Monayi, bikololo; kabitu biakuna maminu, kabiena ne bibutshilu ne mayeba; kadi Nzambi utu wabidisha; mushinga wenu udi mutambe wa nyunyu misangu bungi munyi?”

(Matayo 10:29-31. Luka 12:24)

Kanuangatshi ngasa wa Nzambi bu bualu bua patupu

“Tuetu, benji ba mudimu ne Nzambi, tudi tunusengelela kabidi ne, Kanuangatshi ngasa wa Nzambi bu bualu bua patupu; bua yeye udi wamba ne, Nakakunvuila mu tshikondo tshimpe, mu dituku dia lupandu nakakukuatshisha; monayi, katataka ntshikondo tshimpe, monayi katataka ndituku dia lupandu.”

(2 Kolinto 6:1,2)

Mulami wa nzubu wa lukanu mu Filipoi walomba Paulo ne Sila ne, “Bakelenge, bundi nabu mbua kuenza tshinyi bua kusungidibua? Bakamba ne, Itabuja Mukelenge Yesu, neusungidibue ne ba mu nzubu muebe.”


(Bienzedi 16:30-34)

“Biwajukula ne mukana muebe ne, Yesu udi Mukelenge, ne biwitabuja mu mutshima webe ne, Nzambi wakamubisha ku bafue, neusungidibue. Bualu bua bantu badi bitabuja ne mutshima bua kupeta buakane, badi bajukula ne mukana bua kupeta lupandu. Mukanda wa Nzambi udi wamba ne, Wamuitabuja kena ufuishibua bundu ... bualu bua muntu yonso watendekena dina dia Mukelenge neusungidibue.”

(Lomo 10:8-13)

© C.E.R.S. - B.P. 1673 Kananga
République Démocratique Du Congo
Email: 33eme.cers.lit@gmail.com
<http://www.33eme-cers.org/>

Dinanga dia Nzambi



Dinanga dia Nzambi bua ba pa buloba

“Bu muakabisha Mose nyoka mu tshipela, nunku budi Muana wa muntu nabu mbua kubishibua muomumue; bua muntu yonso witabuja ikale ne muoyo wa tshiendelele. Bualu bua Nzambi wakatamba kusua ba pa buloba, yeye wakabapa Muanandi umuepele mulela bua muntu yonso wamuitabuja kafu biandi, kadi ikale ne muoyo wa tshiendelele.” (Yone 3:14-16)

Mukelenge Yesu wakamba ne, “Tatu wanyi udi musue muntu yonso udi utangila Muana, udi umuitabuja, ikale ne muoyo wa tshiendelele; ne meme nemubishe dituku dia kunshikidilu.” (Yone 6:40)

“Nzambi wakatamba kuleja luse luandi kutudi mu muanda ewu ne, Patutshivua bantu babi, Kilisto wakatufuila.” (Lomo 5:8)

“Tuetu mene netupanduke munyi, bituapetula lupandu bunene nunku, luakadianjila kuambibua kudi Mukelenge, luakajadiki-bua kutudi kudi bakalunvua kudiye?” (Ebelu 2:3)

Dinanga dia Nzambi bua bantu bandi

“Tangilayi mushindu wa dinanga diakutupa Tatu bua tuetu tubikidibue ne Bana ba Nzambi; ne tudi nunku. Ne bualu bua nudi bana, Nzambi wakatuma Nyuma wa Muana wandi mu mitshima yetu, wela diyi diandi ne, Aba, Tatu.”

(1 Yone 3:1. Galatia 4:6)

“Nzambi, ke mudi luse luebe lujalame luikale lua mushinga mukole! Bana ba bantu badi banyemena muinshi mua mundi-dimbi wa mapuapua ebe. Badi bakuta ne bintu bia manyi bikumbana bia mu nzubu muebe, wewe udi ubanuisha ku musulu wa masanka ebe. Kuudi wewe kudi mushimi wa mayi a muoyo; mu munya webe, tudi tumona munya. Yehowa udi mulami wanyi, tshiena nkengela tshintu. Bulelela, buimpe ne luse nebindonde matuku onso a muoyo wanyi; nengikale mu nzubu wa Yehowa tshiendelele.” (Musambu 36:7-9. 23:1,6)

Nzambi wakatamba kuleja luse luandi kutudi

“Mu muanda ewu dinanga dia Nzambi diakamueneshibua bua bualu buetu, bualu bua Nzambi wakatuma Muana wandi umuepele pa buloba bua tuetu tuikale ne muoyo bua bualu buandi. Mu muanda ewu mudi dinanga, kembua tuetu tuakunanga Nzambi, kadi bua yeye wakatunanga, wakatuma Muana wandi bu mulambu bua kubuikila nawu mibi yetu.” (1 Yone 4:9,10)

“Bualu bua difutu dia bubi ndufu, kadi dipa dia luse dia Nzambi muoyo wa tshiendelele mu Kilisto Yesu Mukelenge wetu. Bualu bua nudi basungidibue ku ngasa bua ditabuja; ne diodio kadiena difuma kunudi, ndipa dia Nzambi; kadiena difuma ku midimu, bua muntu kaditumbishi.” (Lomo 6:23. Efeso 2:8,9)

Dinanga dia Mukelenge Yesu

Yesu wakamba ne, “Nakunusua bu muakunsua Tatu, shalayi mu dinanga dianyi. Kakuena muntu udi ne dinanga ditamba edi, dia muntu udi ufuila balunda bandi. Nenuikale balunda banyi, binuenza bu mundi nuambila.” (Yone 15:9,13,14)

“Ndi nushila ditalala, ndi nupa ditalala dianyi; tshiena nupadi bu mudi ba pa buloba banupadi. Mitshima yenu kayizakadi, kayitshinyi. Tangila, ndi mudimanyike ku tshibi, ndi nkokelaku. Biunvua muntu diyi dianyi, ne udi ungunzuluila tshibi, nembuele kudiye, nendie nandi bidia, ne yeye neadie nanyi.”

(Yone 14:27. Buakabuluibua 3:20)

“Udi mua kutupandulula ku dinanga dia Kilisto nganyi? Ndi ngitabushishibua ne, Kakuena lufu, kakuena muoyo, kakuena banjelo, kakuena bakokeshi, kakuena malu atshidiku, kakuena malu atshilualua, kakuena makelenge, kakuena bule, kakuena ndondo, kakuena tshintu tshionso tshikuabo tshifukibua tshidi ne bukole bua kutupandulula ku dinanga dia Nzambi didi mu Kilisto Yesu Mukelenge wetu.” (Lomo 8:35,38,39)